



## JUDICIAL SYSTEM MONITORING PROGRAMME

## PROGRAMA DE MONITORIZAÇÃO DO SISTEMA JUDICIAL

### *Komunikadu Imprensa*

19 Abril 2013

### **Ministériu Públiku alega pena suspensaun tinan 2 ba arguidu kazu krime maus tratus ba kónjuje**

Iha 17 Abril 2013 tribunál Distritál Baucau julga kazu krime maus tratus ba kónjuje ne'ebé involve arguidu ho inisial SVP hasoru nia kónjuje ho inisial EMS. Kazu ne'e rejista iha tribunál ho Númeru Prosesu: 206/Crm.C/2012/TDB ne'ebé akontese iha 03 Setembru 2012 iha Baucau.

*JSMP kontinua preokupa tanba pena suspensaun la equilibriu ho konseitu violénsia doméstika nu'udar krime públiku. JSMP enkoraza Ministériu Públiku no tribunál sira atu konsistente ho prinsípiu penál no kualifikasaun jurídiku ba kada tipu krime ida-idak ne'ebé hatuur ona iha ita nia Kódigu Penál.* dehan Luis de Oliveira Sampaio Diretór Ezekutivu JSMP.

Ministériu Públiku akuza arguidu nu'udar autór materiál ba krime ida ne'e ho artigu 154 Kódigu Penál. Tuir artigu 154 Kódigu Penál defini katak ema ne'ebé prátika maus-tratus fíziku ka psíkiku ba nia kónjuje ka ba ema ne'ebé moris ho nia hanesan feen ho la'en sei hetan pena prizaun tinan 2 too tinan 6, kuandu dispozisaun legál seluk la preve pena todan liu.

Ministériu Públiku akuza katak iha 03 Setembru 2012, arguidu diskuti malu ho vítima tanbá vítima ho mane ida haree filmi iha kuartu laran. Tanba ne'e, arguidu nervozu basa dala tolu iha vítima nia hasan, tebe dala tolu iha vítima nia kidun, tuda vítima ho CD Player no arguidu hodi fatuk tuku dala tolu iha vítima nia kotuk.

Aktu hirak ne'e rezulta vítima sofre bubu iha hasan no moras iha kidun no kotuk laran.

Aleinde ne'e, Ministeriu Públiku mós akuza katak iha data ne'ebé la apurado, arguidu taa vítima nia liman to'o kanek maibé vítima la hato'o keixa.

Relasiona ho faktu sira iha akuzasaun ne'e, arguidu deklara ba tribunál katak faktus iha akuzasaun los hotu. Mesmu nune'e, arguidu mós hatudu ninia arependimentu no ikus mai deklara katak sei la halo tan hahalok sira ne'e hasoru nia fen iha loran seluk.

Depois rona tiha deklarasaun arguidu nian, tribunal kontinua julgamentu ba sesaun alegasaun finál. Iha alegasaun final, Ministériu Públiku ba tribunál atu kondena arguidu ho pena prizaun tinan 1 no suspende ba tinan 2. Pozisaun Ministeriu Públiku ne'e bazeia ba sirkunstánsias atenuante jerál ne'ebé preve iha artigu 55, 2. letra a,b,d, no e, Kódigu Penál. Iha parte seluk, defeza mós husu atu tribunál konsidera sirkunstánsias atuenuante husi arguidu nian.

Tuir mai iha sesaun alegasaun ne'e, defeza iha nia konkluzau husu ba tribunál atu konsidera arguidu nia kolaborasaun no kofisoins iha tribunál hodi aplika pena ne'ebé Kma'an. Defeza mós husu ba tribunál atu konsidera sirkunstansia sira husi arguidu nian.

Tribunál suspende audiéncia no marka data 24 Abril 2013 iha tuku 14 : 00 lorokraik ho agenda rona akordaun.

Audiéncia julgamentu ne'e dirije husi juis kolektivu ne'ebé kompostu husi Dra. Angela Faria Belo, Dr. Afonso Carmona no Dr. José Gonsalves. Ministériu Públiku representa husi Dr. Baltazar Ramós no arguidu hetan defeza husi Dr. Lino Lopes ho nia kolega Dr. Marçal Guterres Ximenes husi advogadu ECM.

Atu hetan informasaun kle'an, favor kontaktu:

Luis de Oliveira Sampaio

Diretór ezekutivu JSMP

Email: [luis@jsmp.minihub.org](mailto:luis@jsmp.minihub.org)

Landline: +670 3323883

[www.jsmp.tl](http://www.jsmp.tl)